

## Protocol

dalla sesida da radunonza generala dalla Surselva Romontscha (SR),  
sonda, ils 27 da mars allas 15:30 uras en casa da scola a Luven

- Tractandas:**
1. Avertura e beinvegni
  2. Tscherna dils dumbravuschs
  3. Protocol dalla radunonza generala 2009
  4. Rapport da gestiun 2009
  5. Rendaquen 2009
  6. Elecziuns
  7. Program da lavur 2010
  8. Varia

### 1. Avertura e beinvegni

Annalisa Cathomas, presidenta dalla SR, fa in cordial beinvegni a tuts presents. Ella dat il plaid a Martin Wetten, anteriur president dalla vischnaunca da Luven, che porta il beinvegni dalla suprastonza communal e presenta in tec Luven: Luven ha 207 habitonts, il davos naschius pér avon in pèr dis, in tierz da las lètgs ein romontschas, in tierz miez e miez ed in tierz buc romontschas. La radunonza communal vegn denton vinavon menada per romontsch. Miriam Pelican, scolasta a Luven, e ses scolars primars diverteschon ils presents cun saults e canzuns en divers lungatgs.

### 2. Tscherna dils dumbravuschs

Proponi ed elegi unanimamein vegnan Martin Cabalzar e Hans Huonder.

### 3. Protocol dalla radunonza gnerala 2009

Il protocol ei vegnius publicaus silla pagina d'internet dalla SR, [www.surselva-romontscha.ch](http://www.surselva-romontscha.ch), plinavon ein copias vegnidas repartidas sillas measas. Il protocol vegn approbabaus unanimamein.

### 4. Rapport da gestiun 2009

Il rapport annual 2009 ei vegnius publicaus ella Quotidiana dils 24 da mars 2010. Annalisa Cathomas prelegia il rapport e commentescha quel. Temas ed activitads che han fatschentau la SR igl onn vargau ein per exempel ils examens d'admissiun, la scola bilingua a Domat, la sentupada da cauvitgs ni era il Tschespet 75.

### 5. Rendaquen 2009

Il cassier Ursin Lutz presenta il quen che siara cun in gudogn da fr. 7'961.40. Igl agen capital munta ussa a fr. 86'395.61. Malgrad l'ediziun d'in niev tschespet siara igl onn 2009 pia cun in pign gudogn ed igl agen capital ei puspei carschius. Cunquei ch'ei vegn adina pli grev da recaltgar mieds finansials ei il considerabel capital era da veser sco reserva per projects e publicaziuns dalla SR.

Demai che negin dils revisurs ei presents prelegia igl actuar Rino Darms il rapport da revisiun e propona d'approbar il rendaquen ed aschia dar scarica al cassier ed alla suprastonza. Il quen annual 2009 vegn approbabaus unanimamein.

### 6. Elecziuns

Demissiuns: Dalla suprastonza han Margrit Darms-Landolt, Vigeli Jacomet ed Ursin Lutz, dils suppleants Lucrezia Berther, Silvana Derungs e dils revisurs Guido Wieland demissiunau.

La president Annalisa Cathomas engrazia ad els per lur lavur prestada per la SR e surdat als suprastonts partents in pign regal.

Elecziuns: La presidenta Annalisa Cathomas stat, sco Ervin Vincenz declara, a disposiziun per ina ulteriura perioda d'uffeci, denton mo sut la cundiziun ch'ella vegni levgiada en sia lavur d'in co-

president(a). Rino Darms, pil mument aunc actuar, ei sedeclaraus prompts da surprender quei post. La co-presidenta ed il co-president vegnan elegi unanimamein.

Per ils treis suprastonts che seretrain ha la suprastonza encuretq treis remplazzonts, tochen sil di dad oz denton anflau mo dus: Irina Lutz, Domat, e Manuela Schnoz-Flury, Mustér. Annalisa Cathomas presenta cuort ellas e damonda, sch'enzatgi dils presents vessi plascher da cumpletar la suprastonza. Carl Cafilisch, Trin, sedeclara la fin finala prompts e Carl Cafilisch, Irina Lutz e Manuela Schnoz-Flury vegnan elegi unanimamein.

Sco novs suppleants vegnan proponi Meinrad Cadruvi, Ruschein, e Simon Bundi, Trun, e sco niev revisur Marcus Holderegger, Schluein. Era els vegnan elegi unanimamein.

## **7. Program da lavur 2010**

Annalisa Cathomas presenta las finamiras ed ils projects per 2010:

- 1.) Optimar e sustener il romontsch en scola (examens d'admissiun, scolas bilinguas)
- 2.) Porscher maun en damondas da lungatg e lavur da lobbying en favur dil romontsch (sentupadas da cauvitgs)
- 3.) Dar impuls per l'elaboraziun d'ovras culturalas romontschas (disc cumpact, Tschespet)
- 4.) Elaboraziun d'ideas per far vegnir enconuschents il romontsch era suls cunfins ora (pin romontsch, collaboraziun cun organisaziuns turisticas)

Annalisa Cathomas arva la discussiun pertuccont il program da lavur 2010 e reparta cedels nua che mintgin sa nudar sias remarclas ed ideas pil program da lavur 2010. Vreni Caprez manegia ch'ei fussi bien, sche la SR fussi pli presenta ellas medias, per ch'ins sappi meglier tgei che marschi.

## **8. Varia**

La presidenta Annalisa Cathomas engrazia a ses consuprastonts ed alla Ligia Romontscha Surselva per la buna collaborazin sco era a tuts che han anflau la via a Luven ed alla vischnaunca da Luven e siara la radunonza.

per sura protocol

igl actuar Rino Darms  
Cuera, ils 27 d'avrel 2010

Suenter la radunonza ha ei dau in referat e silsuenter ina discussiun da podi davart la damonda 'Fusiuns da vischnauncas e lur consequenzas sin lungatg e cultura' cun Ursin Fetz, cusseglader e perscrutader da fusiuns alla HTW Cuera, Ivo Berther, incumbensau per la promoziun da lungatgs digl uffeci da cultura, Georg Fallett, deputau dalla Val Müstair, e Carl Hassler, Riein. Moderau la discussiun ha Georgina Janki.